

**1974 nr. 8 13. mars****Hjúkrunarlög**

Tóku gildi 19. mars 1974. Breytt með 1. 32/1975 (tóku gildi 11. júní 1975), 1. 73/1989 (tóku gildi 14. júní 1989), 1. 116/1993 (tóku gildi 1. jan. 1994) og 1. 76/2002 (tóku gildi 17. maí 2002).

■ **1. gr.** [Rétt til þess að stunda hjúkrun hér á landi og kalla sig hjúkrunarfræðing hefur:

1. sá sem fengið hefur leyfi heilbrigðis- og tryggingamálaráðherra, sbr. 2. gr.,

2. sá sem fengið hefur staðfestingu heilbrigðis- og tryggingamálaráðherra á hjúkrunarleyfi í landi sem aðili er að samningi um Evrópskt efnahagssvæði [og stofnsamningi Fríverslunarsamtaka Evrópu].<sup>1)</sup>

□ Ráðherra skal með reglugerð setja nánari ákvæði um þá sem stunda mega hjúkrun hér á landi skv. 2. tölul. 1. mgr.]<sup>2)</sup>

<sup>1)</sup> L. 76/2002, 4. gr. <sup>2)</sup> L. 116/1993, 4. gr.

■ **2. gr.** [Leyfi skv. 1. tölul. 1. mgr. 1. gr. skal veita þeim sem lokið hefur prófi í hjúkrunarfræðum frá Háskóla Íslands og Háskólanum á Akureyri.

□ Ráðherra getur og veitt hjúkrunarleyfi skv. 1. tölul. 1. mgr. 1. gr. þeim sem lokið hefur sambærilegu prófi og um getur í 1. mgr. í landi utan hins Evrópska efnahagssvæðis [og í Sviss],<sup>1)</sup> enda teljist umsækjandi að öðru leyti hæfur að dómi hjúkrunarráðs.

□ Hjúkrunarráð skal skipað þremur mönnum til fjögurra ára og skal einn tilnefndur af heilbrigðis- og tryggingamálaráðuneyti, einn af menntamálaráðuneyti og einn af Hjúkrunarfélagi Íslands.

□ Útlendingar, sem sækja um leyfisveitingu skv. 2. mgr., skulu hafa næga kunnáttu í töluðu og rituðu íslensku máli.]<sup>2)</sup>

<sup>1)</sup> L. 76/2002, 5. gr. <sup>2)</sup> L. 116/1993, 4. gr.

■ **3. gr.** Enginn má kalla sig sérfræðing í hjúkrun, nema hann hafi fengið til þess leyfi ráðherra.

□ Ráðherra setur reglugerð<sup>1)</sup> um skilyrði til að öðlast sérfræðileyfi að fengnum tillögum hjúkrunarráðs. Hjúkrunarfélag Íslands skal tilnefna [tvo sérfróða hjúkrunarfræðinga]<sup>2)</sup> til þátttöku með ráðinu í meðferð einstakra mála, er varða sérgrein þeirra, og fá [þeir]<sup>2)</sup> þá atkvæðisrétt í ráðinu.

□ Hjúkrunarráð skal einnig fjalla um veitingu sérfræðileyfa.

<sup>1)</sup> Rg. 426/1993, sbr. 246/1981. <sup>2)</sup> L. 32/1975, 2. gr.

■ **4. gr.** Ekki má ráða aðra en [hjúkrunarfræðinga]<sup>1)</sup> skv.

1. gr. til sjálfstæðra hjúkrunarstarfa við sjúkrastofnanir, elliheimili, heilsuvernd eða hjúkrun í heimahúsum.

<sup>1)</sup> L. 32/1975, 2. gr.

■ **5. gr.** [Hjúkrunarfræðingi]<sup>1)</sup> ber að þekkja skyldur sínar, viðhalda þekkingu sinni og tileinka sér þær nýjungar, er varða hjúkrun.

□ Ráðherra getur sett reglur um viðhaldsmenntun.

<sup>1)</sup> L. 32/1975, 2. gr.

■ **6. gr.** [Hjúkrunarfræðingum]<sup>1)</sup> er skylt að gæta fyllstu þagmælsku um öll einkamál, er [þeir]<sup>1)</sup> fá vitneskju um í starfi sínu, nema lög bjóði annað, og helst þagnarskyldan, þótt [þeir]<sup>1)</sup> láti af starfi.

□ Skylda til þess að bera vitni fyrir rétti er takmörkuð í samræmi við þetta og ákvæði réttarfarslaga um vitnaskyldu embættis- og sýslunarmanna og sérákvæði slíkra laga um lækna.

<sup>1)</sup> L. 32/1975, 2. gr.

■ **7. gr.** Ef [hjúkrunarfræðingur]<sup>1)</sup> vanrækir skyldur sínar eða brýtur gegn heilbrigðislöggjöf landsins að dómi landlæknis, skal landlæknir áminna [hann].<sup>1)</sup> Komi áminningin ekki að haldi, leggur landlæknir málið fyrir ráðherra. Getur þá ráðherra úrskurðað, að hlutaðeigandi skuli sviptur hjúkrunarleyfi, en skjóta má hann þeim úrskurði til dómstóla.

□ Nú hefur [hjúkrunarfræðingur]<sup>1)</sup> verið [sviptur]<sup>1)</sup> hjúkrunarleyfi skv. 1. mgr., og er þá ráðherra heimilt að veita [honum]<sup>1)</sup> leyfið aftur, enda liggi fyrir meðmæli landlæknis.

□ [Ákvæðum 1. og 2. mgr. skal eftir því sem við á beitt gagnvart þeim sem hlotið hafa staðfestingu heilbrigðis- og tryggingamálaráðherra skv. 2. tölul. 1. mgr. 1. gr.

□ Nú er einstaklingur, sem hér starfar á grundvelli leyfis skv. 2. tölul. 1. mgr. 1. gr., sviptur því leyfi og fellur þá niður heimild hans til að starfa hér á landi.]<sup>2)</sup>

<sup>1)</sup> L. 32/1975, 2. gr. <sup>2)</sup> L. 116/1993, 4. gr.

■ **8. gr.** . . . <sup>1)</sup>

<sup>1)</sup> L. 73/1989, 2. gr.

■ **9. gr.** Heilbrigðismálaráðherra getur með reglugerð sett nánari ákvæði um efni laga þessara.

■ **10. gr.** Brot gegn lögum þessum og reglugerðum settum samkvæmt þeim varða sektum, nema þyngri refsing liggi við að öðrum lögum.

□ Með mál út af brotum á löggjöfinni skal fara að hætti opinberra mála.

□ Sektir samkvæmt löggjöfinni renna í ríkissjóð.